


授

經

圖





授經圖

朱睦㮮著

叢書集成初編

(補印本)

授 經 圖

一九三七年十二月初版

一九五九年十月補印

朱 睦 摯 著

商務印書館出版

上海華文印刷廠印刷

授經圖序

汴上陸樸撰

余觀崇文總目有授經圖。不著作者名氏。敘易、詩、書、禮、春秋三家之學。求其書亡矣。及閱章俊卿考索圖。六經皆備。閒有訛舛。余因考之。蓋自東漢而下。諸儒授受。尠有的派。云其經義。或私淑。或自治。或習之國。學俱稱爲某授。某受可乎。余於是稽之本傳。參之諸說。以嘗請業及家學者。各爲之圖。以一二傳而止者。亦錄之以備咨考。舊圖俱無傳。圖後或錄經論數條。而諸儒行履弗具。使覽者不知其爲何如人也。余旣爲圖。復摭撫其要而作傳。無關經學。無裨世教者。皆略焉。傳成。以諸儒著述及歷代經解附之。爲若干卷。藏之家塾。以俟同好。庶斯道之不墜也。

萬歷元年孟秋望日。

授經圖總目

易四卷

書四卷

詩四卷

春秋四卷

禮四卷

朱西亭宗正諱睦樛字灌甫西亭其號也周定王六世孫萬歷初舉爲周藩宗正領宗學事事迹附見明史周王橚傳著五經稽疑六卷經序錄五卷春秋諸傳辨疑四卷諡苑二卷韻譜五卷鎮平世系記一卷及明帝世表周國世系表建文遜國褒忠錄河南通志開封郡志陂上集諸書少從睢陽許先遊三月而盡其學年二十通五經起萬卷堂讀書其中嘗謂本朝經學一稟宋儒古人經解殘闕放失乃訪求海內通儒繕寫藏弆晚年遂著是編名之曰授經圖每經四卷凡二十卷按授經圖之名創始於宋人程俱至後李燾有五經傳授圖一卷亡名氏有授經圖三卷俱見宋史惜其書不傳宗正是編因章氏山堂考索中舊圖重加釐正師友淵源燦如星掌大旨慮漢學之失傳故所述列傳至漢而止國朝錢塘龔御史翔麟蘅圃病其未廣因取家藏寫本俾晉江黃徵君虞稷俞邵爲之增益易先復古書

首今文。前後次序。悉經改易。凡增入古今作者二百五十五人。經解七百四十一部。六千二百一十八卷。刊之白下。較原書雖爲詳備。而實非宗正著述之本意矣。今所傳者。皆龔黃點竄之本。宗正舊帙。渺不可得。聞當日藏書甚富。倣唐人四部法。用牙籤識別。凡一萬二千五百六十卷。輯爲聚樂堂藝文志四冊。汴亡之後。盡漂蕩於洪流中。此書板片。想亦隨之而沒。良可慨也。茲帙刊於萬歷癸酉。雕鏤甚精。楮墨渝暗。定爲原刻無疑。龔蘅圃謂向無刊板。不知何據。且卷末勤菴跋。龔刻以菴爲羹。不免歧誤。更不及原書爲善也。勤菴字伯榮。宗正子。繼爲周藩宗正。著王國典禮八卷。以文學世其家。道光己亥二月花朝日。三原李錫齡識於惜陰軒。

授經圖易卷第一義例

明 宗正朱睦㮮西亭著

禮、擬人必以其倫。漢諸帝能從師受經，至美也。美而不錄，不可與儒生儕也。不可儕，故殊之。殊之者，尊之也。諸儒傳，有關經學則詳，否則識其出處大節而已。事實尠少，不可爲傳者，附其姓氏爵里於諸傳內以見之。

諸儒有通四經五經者，傳祇一見。餘皆繫名於各派之下，覽其圖則自知矣。

京房有二，其一頓丘人，其一不知何許人，皆以易學顯，爲太中大夫者。顏師古謂書字誤耳，不當作京房。今圖並存，以備參考。

費直自爲易以相授受，原無師傳，故別爲一圖。

高相易自言出丁將軍寬，寬爲景帝時人，相爲平帝時人，相去甚遠，或亦私淑者也。欲附丁易一派，無所安置。經籍考謂相受易王橫，橫，費派也。茲因之圖從費氏。


舊圖授受，非的派者不錄。書十七人，詩十九人，周禮二人，移置別派者，易三人，詩四人，禮一人。舊圖所遺者，余據註疏及史漢諸書補入。易二十九人，書二十八人，詩十四人，春秋三十三人，禮記一人。

周禮十一人。

諸儒經解。非有作者姓氏不錄。錄之。或因人以存其書。或因書以彰其人。周漢而下至金元。作者凡一千一百三十二人。國朝三十九人。經解凡一千七百九十八部。二萬一千七十一卷。

授經圖易卷第二圖表

商瞿——橋庇——馯臂——周醜——孫虞



費直——王璜——
 費高——毋將永
 高相——子康

梁丘賀——臨——
 五鹿充宗——
 王駿——
 鄧彭祖——
 士孫張——
 衡咸——

授經圖易卷第三諸儒傳略

汴上陸樺撰

商瞿魯人字子木受易孔子以授魯人橋庇子庸子庸授江東馯臂子弓子弓授燕人周醜子家子家授東武孫虞子乘子乘授齊人田何

田何字子裝漢興以齊田徙杜陵號杜田生授易丁寬及東武王同子中雒陽周王孫齊人服生光皆著易傳數篇王同授淄川楊何何字叔元元光中徵爲太中大夫著易二篇又授齊人卽墨成成至城陽相廣川孟但爲太子門大夫魯人周霸莒人衡胡臨淄主父偃周王孫授衛人蔡公著易二篇皆以易貴顯要言易者本之田何

丁寬字子襄梁人初梁項生從田何受易時寬爲項生從者讀易精敏材過項生遂事何學成何謝寬寬東歸何謂門人曰易以東矣景帝時寬爲梁孝王將軍作易說三萬言訓故舉大誼而已寬授同郡碭日一室田王孫王孫授施讐孟喜梁丘賀繇是易有施孟梁丘之學

主父偃齊國臨淄人受易於王同游齊諸子閒諸儒生相與排擯不容於齊家貧偃貸無所得北游燕趙中山皆莫能厚客甚困以諸侯莫足游者元光元年迺西入關見衛將軍青青數言於上上不省資用乏留久諸侯賓客多厭之迺上書闕下朝奏暮召入見所言九事其八事爲律令一事諫伐匈奴是時徐樂

嚴安亦俱上書言世務。上謂三人曰：公皆安在？何相見之晚也？迺拜偃等皆爲郎中。偃數上疏言事，遷謁者、中郎、中大夫。歲中四遷。元朔中，拜偃爲齊相。無何，齊王懼偃發陰事，自殺。上怒，迺徵下吏治，遂族偃。偃方貴幸時，客以千數。及族死，無一人視。獨孔車收葬，上聞之，以車爲長者。

施讐字長卿，沛人。沛與碭相近，讐爲童子，從田王孫受易，與孟喜、梁丘賀竝爲門人。謙讓，常稱學廢不教授。及梁丘賀爲少府事多，迺遣子臨分將門人從讐問。讐自匿不肯見，賀固請不得已，乃授臨等。於是薦讐結髮事師數十年，賀不能及。詔拜讐爲博士，甘露中與五經諸儒雜論同異於石渠閣。讐授張禹、琅邪魯伯、伯爲會稽太守，禹爲丞相，禹授淮陽彭宣，沛戴崇子平，崇爲九卿，宣大司空。魯伯授太山毛萇如少路、琅邪邴丹、曼容，莫如至常山太守。繇是施氏有張彭之學。

孟喜字長卿，東海蘭陵人。父號孟卿，善爲禮。春秋授后蒼，疏廣。世所傳后氏禮、疏氏春秋，皆出孟卿。孟卿以禮經多，春秋繁雜，乃使喜從田王孫受易。喜好自稱譽，得易家候陰陽災變書，舉孝廉爲郎，曲臺署長。以病免，後爲丞相掾。博士缺，衆人薦喜，上聞喜改師法，遂不用喜。喜授同郡白光少子，沛人翟牧子兄。曰：皆爲博士，繇是孟氏有翟白之學。

梁丘賀字長翁，琅邪諸人。初從太中大夫京房受易。房淄川楊何弟子也，非爲課吏法者。及房出爲齊郡太守，賀更事田王孫。宣帝時，聞京房爲易明，求其門人得賀。賀時爲都司空令，坐事免。因召賀入說經，上善之，以賀爲郎。會八月飲酎，行祠孝昭廟，先殿旄頭劍挺墮，墜首垂泥中。刃鄉乘輿，車馬驚，於是召賀筮。

之有兵謀不吉。帝還。使有司侍祠。是時霍氏外孫代郡太守任宣坐謀反誅。宣子章爲公車丞。亡在渭城界中。夜玄服入廟。居郎間。執戟立廟門。待帝至。欲爲逆。發覺。伏誅。賀以筮有應。繇是近幸爲太中大夫。給事中。至少府。子臨。

臨傳父業。亦入說經。爲黃門郎。甘露中。奉使問諸儒於石渠。臨學精熟。專行京房法。琅邪王吉聞臨說。善之時。宣帝選高材郎十人從臨講。吉乃使其子郎中駿上疏從臨受易。臨授五鹿充宗。君孟。充宗爲少府。駿爲御史大夫。充宗授平陵士孫張仲方。沛人鄧彭祖子夏。齊人衡咸。長賓。張爲博士。至揚州牧。光祿大夫。給事中。家世傳業。彭祖真定太傅。咸講學大夫。繇是梁丘有孫鄧衡之學。

張禹。字子文。河內枳人。爲兒時。數隨家至市。喜觀於卜相者。前久之。頗曉其別。著布卦之意。時從旁言。卜者愛之。謂禹父是兒多知。可令學經。及禹壯。從沛郡施讐受易。旣明習。舉爲郡文學。甘露中。諸儒薦禹。詔太子太傅蕭望之問禹對易。望之善焉。奏禹經學精習。有師法。試爲博士。初元中。詔令授皇太子。遷光祿大夫。數歲。出爲東平內史。成帝卽位。徵禹以師。賜爵關內侯。食邑六百戶。秩中二千石。給事中。領尙書事。是時。帝舅平陽侯王鳳爲大將軍。輔政專權。而上富於春秋。方嚮經學。敬重師傅。而禹與鳳竝領尙書事。內不自安。數病。上書乞退。上報曰。朕以幼年執政。萬機懼失其中。君以道德爲師。故委國政。君何疑而數乞骸骨。忽忘雅素。欲避流言。君其固心致思。總秉諸事。推以孳孳。無違朕意。加賜黃金百斤。養牛。上尊酒。太官致餐。侍醫視疾。使者臨問。禹惶恐。復起視事。河平四年。代王商爲丞相。封安昌侯。爲相六歲。以老病。

乞休。上加優再三。乃聽許。賜安車駟馬。罷就第。建平二年薨。諡曰節侯。

蓋寬饒。字次公。魏郡人。從孟喜受易。爲郡文學。以孝廉爲郎。累擢司隸校書。舉刺無所回避。京師爲清。寬饒剛直高節。志在奉公。家貧。奉錢月數千。半以給吏民爲耳目言事者。子常步行自戍北邊。公廉如此。以上封事。坐怨謗下吏。寬饒自剄。

焦贛。字延壽。梁人。以好學得幸梁王。王共其資用。令極意學。贛初從孟喜。繼又得隱者之傳。學旣成。爲郡史。察舉補小黃令。以候司先知姦邪。盜賊不得發。愛養吏民。化行縣中。舉最當遷。三老官屬尙書。願留贛。有詔許增秩留。卒於小黃。贛常曰。得我道以亡身者。必京生也。其說長於災變。分六十四卦。以兌、震、坎、離。應二至二分。其餘卦以中孚起。每一卦六日七分。更直用事。以風雨寒溫爲候。各有占驗。所著有易林十六卷。趙賓。蜀人。好小數書。持論巧慧。易家不能難。云受孟喜。喜爲名之。後賓死。莫能持其說。

京房。字君明。東明頓丘人。受易梁人焦延壽。延壽云。嘗從孟喜問易。會喜死。房以爲延壽易卽孟氏學。至成帝時。劉向校書。考易說。以爲諸易家說皆祖田何。楊叔元。丁將軍。大誼略同。惟京氏爲異。京氏以明災異得幸。爲石顯所譖。誅房。授東海殷嘉。河東姚平。河南乘弘。及任良。皆爲郎。博士。繇是易有京氏之學。彭宣。字子佩。淮陽陽夏人。治易。事張禹。舉爲博士。遷東平太傅。禹以帝師見尊信。薦宣經明有威重。可任政事。繇是入爲右扶風。歷遷大司空。封長平侯。及王莽秉政。宣上書乞骸骨。莽恨宣求退。遂白太后策免。不賜黃金。安車駟馬。宣居國數年。薨。諡頃侯。

劉昆字桓公陳留東昏人梁孝王之胤也平帝時受施氏易於沛人戴賓王莽世教授弟子恒五百餘人莽以昆多聚徒衆繫昆及家屬於外黃獄莽敗得免建武五年舉孝廉不行遂逃教授江陵光武聞之卽除爲江陵令遷弘農太守有異政帝聞而徵之代杜林爲光祿勳令入授皇太子及諸小侯五十餘人二十七年拜騎都尉以老乞骸骨詔賜洛陽第舍以千石祿終其身中元二年卒子軼字君文傳昆業門徒亦盛永平中爲太子中庶子建武中稍遷宗正卒官遂世掌宗正焉

姚平河東人京房弟子房欲建考功課吏法薦平爲刺史時石顯疾房言之元帝遂出房爲魏郡太守至新豐因郵上書曰臣弟子姚平謂房曰房可謂知道未可謂信道也房言災異未嘗不中今涌水已出道人當逐死尙復何言臣謂陛下至仁於臣尤厚雖言而死臣猶言也平又曰房可謂小忠未可謂大忠也昔秦時趙高用事有正先者非刺高而死高威自此成今臣出守自詭効功惟陛下毋使臣塞涌水之異當正先之死爲姚平所笑房去月餘竟徵下獄

費直字長翁東萊人治易爲郎至單父令長於卦筮亡章句徒以象象繫辭文言爲十篇解說上下經琅邪王璜平中仲一曰能傳之

高相沛人治易與費高同時其學亦亡章句專說陰陽災異受之王璜傳子康及蘭陵毋將永康以明易爲郎永至豫章都尉繇是易有高氏之學



授經圖易卷第四諸儒著述附歷代三易傳注

連山十卷夏后氏易司馬膺注

周易二卷卜商傳

歸藏備遺三卷朱元升

右古易

一字石經周易一卷

秦本石經周易九卷

右石經

周易章句十卷孟喜

周易章句二篇梁丘賀

周易章句十卷京房

周易章句五卷劉表

歸藏三卷商易薛貞注

連山備遺四卷朱元升

周易備遺三卷朱元升

今字石經周易三卷

蜀本石經周易十一卷

周易章句二篇施讐

周易章句四卷費直

周易章句十卷馬融

周易章句十卷荀爽